

ՀԱՅԵՐԸ ՄՈՍԿՎԱՅՈՒՄ XV—XVII ԴԱՐԵՐՈՒՄ

Վ. Կ. ՈՍԿԱՆՅԱՆ

Հայերի Մոսկվայում լինելու մասին առաջին հիշատակությունները վերաբերում են XIV դ. երկրորդ կեսին։ Ռուս տարեգիրքը հաղորդում է, որ Նիժնի-Նովգորոդում հավաքված առաջին (1366 թ.) տոնավաճառին մասնակցելու եկած հայ առևտրականները, ինչպես և արևելյան այլ վաճառականներ, թալանվել են Մեծ Նովգորոդից Վոլգայով դեպի Մոսկվա և Նիժնի-Նովգորոդ տանող ճանապարհի վրա գործող ուշկույների ավազակախմբի կողմից¹։

Հավանաբար հայերը Նիժնի-Նովգորոդից Մոսկվայի վրայով գնում-հասնում էին մինչև Մեծ Նովգորոդ, անխուսափելիորեն հանդիպանելով Մոսկվայում, որը XIV դ. կեսերին մեծ իշխանության կենտրոն էր։ Թաթարների դեմ Մոսկվայի Մեծ իշխան Դմիտրի Դոնսկոյի մղած նշանավոր Կուլիկովյան ճակատամարտում զոհվածների թվում տարեգրությունը հիշատակում է «Անդրեյ Սերկիզովի» և «Սիմեոն Մելիքովի» անունները² (ընդ որում, Մելիքովը առաջինն էր հաղորդել Մամայ իշխանի թաթարական հորդայի՝ Մոսկվայի վրա հարձակման գնալու լուրը)։ Արդեն XIV դ. Մոսկվայում բնակվում են հայեր 1390 թ. հուլիսին Մոսկվայում բռնկված հրդեհից սկսվել էր հայազգի Աբրամի տնից, ոչնչացնելով մի քանի հազար շենքեր Պոսադում՝ առևտրա-արհեստագործական թաղամասում³։ Ինչպիսի նկատել է ակադ. Մ. Ն. Տիխոմիրովը, մոսկովյան առևտրական գործարքներում կարևոր տեղ ունեին հայ վաճառականները, որոնք Հովհաննես Կարապետի տոնին արևելցի սյլ վաճառականների հետ մասնակցում էին Կադանի տոնավաճառներին, զալիս ու գնում էին Մոսկվա, հաճախ երկարատև կամ մշտական բնակություն հաստատելով այնտեղ։ Նա այդ փաստերը բացատրում է Մոսկվայի բնակչության մեջ նկատելի հայկական տարրի առկայությամբ և գտնում է, որ հայ գաղութը մայրաքաղաքում հիմնադրվել է XV դարում⁴։ Հայերի դերին նույնպիսի գնահատական է տալիս ակադ. Գրեկովը և շեշտում, որ հայերը Մոսկվա էին զալիս Ցարգրադից ու Ղրիմից⁵։

Ոսկե Հորդայից դեսպանների հետ Մոսկվա էին զալիս հաղարավոր վաճառականներ։ Միայն մի դեսպանության հետ եկածների թիվը հասնում էր 3200-ի⁶, որոնց մեջ զալի թիվ էին կազմում հայերը։ Ղրիմից հայերը Մոսկվա

¹ Полное собрание русских летописей (այսուհետև՝ ПСРЛ), հատ. XXV, Մոսկվա, 1949, էջ 183։

² Նույն տեղում, հատ. IV, էջ 81, 204։ Տե՛ս նաև հատ. VI, էջ 96—97։

³ Նույն տեղում, էջ 218։

⁴ М. Н. Тихомиров, Древняя Москва, М., 1947, էջ 92—99, 142—143։

⁵ Б. Д. Греков, Крестьяне на Руси, М., 1947, էջ 98—99, 142—143։

⁶ С. М. Соловьев, История России, кн. I, СПб., 1862, էջ 1535։

էին տանում ձիեր և արևելյան ապրանքներ, որոնց կարիքը մեծանում էր մոսկովյան արքունիքում հատկապես XV դ. երկրորդ կեսին: Իվան III ցարը իր առևտրական գործակալի՝ հայազգի խոջա Կակոսի միջոցով կապ էր հաստատել Կաֆայի հետ⁷:

Մոսկովյան մեծ իշխան Իվան III-ը (1462—1505 թթ.) հաջողությամբ միավորեց Կենտրոնական Ռուսաստանի իշխանությունները և իրավամբ իրեն հայտարարեց «Համայն Ռուսիայի մեծ իշխան»: Ֆ. Էնգելսը նշում է այն կաբլեր հանգամանքը, որ «ուղեկային իշխանների հպատակացումը զուգորդվում էր թաթարական լծից ազատագրվելու հետ և վերջնականապես ամրացվեց Իվան III-ի կողմից»⁸: Այդ հաջողություններին Իվան III-ը հասավ խելացի ներքին քաղաքականության ու դիվանագիտական մեծ ջանքերի շնորհիվ: Սա կարողացավ հաջող արշավանքով 1469 թ. իրեն ենթարկել Կազանի թաթարական խանին⁹, բարելավեց հարաբերությունները եվրոպական պետությունների ու Վատիկանի հետ, կապեր հաստատեց Ռուսիայի և Մերձավոր Արևելքի ու Անդրկովկասի իշխանությունների միջև: Հռոմի Պողոս II պապի կողմից լիազորված Բուրգունդիայի դեսպան Լյուդովիկ Բոլոնսկին և ռուսական պետության կողմից Անդրկովկաս ուղարկված Մարկո Ռոսոն եղան նաև Թավրիզում, որտեղ հանդիպեցին Կոնստանդնուպոլսի հետ և 1475 թ. միասին գնացին Ֆասոս (Փոթի՝ Վրաստանում): Հռոմի պապն ու Եվրոպայի պետություններն ուղում էին Ռուսաստանի միջոցով խաչակրաց արշավանք կազմակերպել օրըստօրե հզորացող ագրեսիվ Թուրքիայի դեմ: Սակայն Իվան III-ը պետք է նախ ազատվեր թաթարական գերիշխանությունից, որը զգալիորեն թուլացել էր, բայց չէր վերացել: 1480 թ. Մեծ Հորդայի Ահմատ խանը իր զորքերով մուտեցավ Մոսկովյան մատույցներին, կանգնեց ռուս զորքերի հանդիման՝ Ուզրա գետի ափին, բայց չհամարձակվեց կռիվ սկսել և ետ նահանջեց՝ փաստորեն օրինականացնելով թաթարական տիրապետության վերացումն ու մոսկովյան իշխանության անկախությունը: Այս բախտորոշ իրադարձությունը մեծապես նպաստեց Ռուսաստանի հզորացմանը: Ինչպես նկատել է Մաքսը, դրանից հետո «մենք Իվան III-ին տեսնում ենք միանգամայն անկախ գահի վրա նստած: Նրա կողքին՝ բյուզանդական վերջին կայսեր դուստրը: Ոսկե Հորդայի բեկորները ժողովվել են նրա արքունիքի շուրջը... Լիվոնյան ասպետները ջախջախված են... Զարմացած Եվրոպան, որ Իվան III-ի թագավորության սկզբում նույնիսկ հաղիվ էր նկատում Մոսկովիայի դոյությունը, շշմել էր իր արևելյան սահմանների վրա հսկայական պետության հանկարծակի հանդես գալուց. և ինքը՝ սուլթան Բայազեթը, որի առաջ դողդողում էր Եվրոպան, առաջին անգամ լսեց Մոսկովիտի գոռոզամիտ ճառերը»¹⁰: Եթե Մոսկովիայի հզորացումը աշդուհի ուժեղ տպավորություն էր գործել աշխարհի հզորների վրա, ապա պարզ է, թե ինչքան մեծ էր դրա նշանակությունը իրենց անկախությունը կորցրած և թուրքական նվաճումների նախադասը գտնվող փոքր ժողովուրդների համար:

Թաթարական լծի տապալումից անմիջապես հետո Իվան III-ի մոտ են գալիս վրացական թագավոր Ալեքսանդրի դեսպանները՝ նախիմանը, Դեմիյա-

⁷ ՏՃՍ «Очерки истории СССР (конец XV в., начало XVII в.)», М., 1955, էջ 89:

⁸ К. Маркс и Ф. Энгельс, Сочинения, т. XVI, ч. I, էջ 450:

⁹ ПСРЛ, т. VI, էջ 189:

¹⁰ ՏՃՍ «История дипломатии», հատ. I, Մ., 1941, էջ 197:

նր և խոզի-Մարումը (վերջինը հավանաբար հայազգի խոջա Միրաքն էր, որ շատ լավ փոխհարաբերությունների մեջ էր վրացական շրջանների հետ և կատարել էր դիվանագիտական բանագնացություններ Եվրոպայում)¹¹։ Վրաց իշխանն ընդգծում էր երկրի ծանր վիճակը և խնդրում օգնություն ու հովանավորություն¹²։

Ինչպես գրում է պրոֆ. Բադիլևիչը, ռուս-վրացական (մենք կասեինք նաև ռուս-հայկական) կապերն այդ ժամանակ արդեն «նշանակալիորեն ավելի ընդարձակ են եղել, քան թե ներկայացվում է սահմանափակ աղբյուրների հաղորդումով»¹³։

Պոլսի անկումից հետո հունադավան ժողովուրդները բնականաբար իրենց հայացքը պետք է հառեին նոր բարձրացող հյուր Մոսկվայի պետությանը¹⁴։ որից պետք էր օգնություն հայցել։ Մոսկվայի XV դարի վերջերին և XVI դ. սկզբներին արդեն դարձել էր աշխարհի հետ կապված խոշոր առևտրա-արդյունադրածական կենտրոն։

Հայերի շփումները Մոսկվայի հետ եղակի ու պատահական չէին։

Եթե Բյուզանդական կայսրության անկման ու թուրքերի կողմից Պոլսի գրավման ժամանակակից ու ականատես Աբրահամ Անկյուրացին երազում էր, որ «հոռմայացոց» միջոցով անհավատ «հագարացոց» ձեռքից ազատվի «Սուրբ Սոփի» տաճարը¹⁵։ ապա նրա անհայտ ժամանակակիցը իր «թագուհի մի տեսա» սկզբնատողով պոեմում թուրքական տիրապետությունից Պոլսի ազատագրության մեջ արդեն նշմարում է Մոսկվայի դերը¹⁶։ Ուշագրավ է այն, որ պահպանվել են այդ պոեմի տասներկու տարբերակներ՝ փաստ, որ վկայում է XV—XVII դդ. Մոսկվային տրվող նշանակության մասին։ Ինչպես ճիշտ կռահել է Աս. Մնացականյանը, Մոսկվայի իշխանի և նրա թագուհու մասին գրված այդ պոեմի հեղինակը նկատի ունի Իվան III-ի և Բյուզանդիայի վերջին կայսր Կոստանդինի եղբոր դուստր Սոֆիայի ամուսնության քաղաքական նկատառումները, երբ Պալեոլոգները և Հոմի պապը հույս ունեին Ռուսաստանի օգնությամբ ազատագրել Կոստանդնուպոլիսը¹⁷։ Այսպես, XV դ. հայ հեղինակը լավ գիտի Մոսկվայում կատարված դեպքերը՝ Իվանի ամուսնությունը Սոֆիայի հետ։

¹¹ ՏՃՍ Կ. В. Базилевич, Внешняя политика русского централизованного государства, М., 1952, էջ 409—414; ՏՃՍ նաև «Труды объедин. научной сессии по общ. наукам», Баку, 1957, էջ 288—292։

¹² Ալեքսանդր Իվան III-ին գրում էր. «Темным еси свет, зеленого неба звезда еси... всем князем вышний князь, земли еси тишина», А. Цагарели, Сношения России с Кавказом в XVI—XVII вв., СПб., 1891, էջ 8։

¹³ К. В. Базилевич, նշվ. աշխ., էջ 411։

¹⁴ ՏՃՍ Н. С. Чаев, «Москва—Третий Рим» в политической практике..., «Исторические записки», т. XVII, М., 1945։

¹⁵ ՏՃՍ Հ. Ս. Անասյան, Հայկական աղբյուրները Բյուզանդիայի անկման մասին, Երևան, 1957, էջ 29—30։

¹⁶ ՏՃՍ Ա. Գ. Աբրահամյան, Ռուս ժողովուրդը և Մոսկվայի հայ մատենագրության մեջ, Երևանի պետական համալսարանի գիտ. «Աշխատություններ», հատ. XXVII, Երևան, 1948, էջ 209—235; ՏՃՍ նաև Ա. Մնացականյան, Մոսկվայի միջնադարյան հայկական մի պոեմում, ՀՍՍՀ ԳԱ «Տեղեկագիր», 1948, № 3, էջ 50։

¹⁷ ՏՃՍ Աս. Մնացականյան, Հայկական միջնադարյան ժողովրդական երգեր, Երևան, 1956, էջ 272, 565։

Հռոմի պապի միջամտությունն ու հակաթուրքական պայքարին Ռուսաստանին մասնակից դարձնելու ձգտումները:

Մոսկվայի հետ կապերի ստեղծմանը նպաստում էին ռուսահայ և այլ գաղթավայրերում բնակվող վաճառականների առևտրական ուղևորություններն ու հանդիպումները և զանազան երկրներից Մոսկվա դնացող հայազգի դիվանագետների բանադնացությունները:

Այսպես, 1482 թ. Մոսկվայում էր լեհական դեսպան հայազգի Բոդզանը, որին Իվան III-ը հանձնարարել էր իր հրովարտակը տանել Թամանի իշխանին: Բոդզանը եղել էր նաև Ղրիմում, խանի մոտ, որը Մոսկվայի հետ դաշինքի մեջ էր և խոստացել էր Իվան III-ի «թշնամիներին թշնամի լինել, բարեկամներին՝ բարեկամ»¹⁸:

1495 թ. Մոսկվայից Ղրիմ են մեկնում վաճառականներ, որոնց թվում՝ հայ Սերկիզը իր «7 մարդկանցով»¹⁹, 1495 թ. Մոսկվա ուղարկված Ղրիմի դեսպանությունը հետ էր խողել, որ Մոսկվայում հիվանդացել էր: Խանը Մոսկվա էր ուղարկել Կուլուին՝ «իբր ընկերոջը» (որը խողելի եղբայրն էր և 5 տարի Մոսկվայում էր): Հիվանդին բերելու համար Մոսկվա էր մեկնել նաև մի այլ խոջա՝ Լյուտին: Հիշատակվում է, որ Մոսկվայում են կաֆայեցի Բոգոսը, Ալա-եոզը, Լյուտվին և այլ հայեր:

1501 թ. Լիտվայի իշխան (ապա Լեհաստանի թագավոր) Ալեքսանդրը (1492—1506 թթ.) իր սուրհանդակ հայազգի Սալթանի միջոցով հաշտության առաջարկ է ուղարկում Իվան III-ին²⁰:

XVI դ. հայերի առևտրական այցերը Մոսկվա ավելի հաճախակի են դառնում: 1516 թ. ռուս դեսպանի հետ Թուրքիայից Մոսկվա են գնում հայեր²¹:

Այսպես, հայերը հաճախակի լինում էին Մոսկվայում, ասլում ամիսներ ու տարիներ, կատարելով առևտրա-տնտեսական և դիվանագիտական-քաղաքական գործարքներ: Բայց սրանով չէր սպառվում հայերի կապը Մոսկվայի հետ և Մոսկվայի նշանակությունը հայերի ու Հայաստանի համար: XVI դ. վերջերից ու XVII դարում Հայաստանի ու Անդրկովկասի ազատագրության հարցը ավելի ու ավելի հաճախ էր արծարծվում ռուսական արքունիքում: 1518 թ. Հռոմի պապի ու Մաքսիմիլիան կայսեր կողմից Մոսկվա եկած Ֆրանցիսկ և Անտոնիո դեսպանները Ռուսաստանին առաջարկում էին պատերազմ հայտարարել Թուրքիային, որ նվաճել է Իբերիան, Ալբանիան ու Մեծ Հայքը²²: Պապը կոչ էր անում Վասիլի III-ին «պաշտպան կանգնել իր հայրենիք Կոստանդնուպոլսին», «բնդհանուր քրիստոնեական բարօրության համար»:

1547 թ. հրավիրվում է էջմիածնի պաղտի ժողովը, որի նախաձեռնող Ստեփանոս կաթողիկոսը մեկնեց Լեհաստան և եղավ Մոսկվայում²³:

Մոսկվայի դերը հայերի կյանքում ավելի ակնբախ դարձավ, երբ Իվան Ա-հեղի օրոք (1547—1584 թթ.) Ռուսաստանը նվաճեց Կազանի ու Աստրախանի խանությունները և դարձավ Անդրկովկասի անմիջական հզոր հարևանը:

18 *СЛ* «Сборник Русского исторического общества» (РИО), т. 41, № 32—33 և 53:

19 Նույն տեղում, № 230:

20 Նույն տեղում, № 359—361: Ընդ որում նշվում է, որ հայը կիևցի է («киянин»):

21 Նույն տեղում, հ. 95, № 236:

22 А. Пагареги, *նշվ. աշխ.*, № 9:

23 «Очерки истории СССР (конец XV, начало XVII вв.)», № 850:

Պահպանվել են հիշատակություններ այն մասին, որ 1552 թ. Կազանում կային հայ վաճառականներ և թնդանոթածիղներ²³, որ Կազանից հաղթանակով վերադարձած ռուս զորքին ու ցարին Մոսկվայում ռուսների հետ դիմավորել են նաև բաղմաթիվ հայեր²⁵։

Կազանի ու Աստրախանի նվաճումը լայն հեռանկարներ էր ստեղծում Իվան IV-ի արևելյան քաղաքականության համար։

Ի նշանավորումն թաթարների դեմ տարած հաղթանակի և Կազանի խանությունը Ռուսաստանին միացնելու, Մոսկվայում 1552—1556 թթ. կառուցված «Պոկրովսկի» տաճարի (որ հետագայում անվանվեց նաև «Վասիլի Երանելու տաճար») 9 զմբեթներից մեկը կոչվեց Գրիգոր Լուսավորչի անունով։

Աստրախանի միացումը Ռուսաստանին ամրապնդեց Մոսկովյան պետության դիրքերը Կասպից ծովի հյուսիսային ափերին և հնարավորություն ստեղծեց անմիջական կապեր հաստատել Անդրկովկասի հետ։

Մոսկվայի հետ ունեցած կապերի ամրապնդմանն ու հայկական գաղութի աճին խանգարեցին զրեթե անընդմեջ թաթարական հարձակումները և 25-ամյա լիվոնյան պատերազմը (1558—1583 թթ.)։ Սակայն անգամ այդ պայմաններում Իվան IV-ին դիմելու փորձեր են արվում՝ Ռուսաստանից օգնություն հայցելու և առևտրական կապեր հաստատելու համար։

Դեռևս 1553 թ. Իվան IV-ին դիվանագիտական հարաբերություններ հաստատելու առաջարկություն է անում Թահմազ I-ը։ 1563 թ. Շամախիից Աբդուլլա խանի ղեկավարը դալիս է Մոսկվա ու խնդրում հովանավորություն, Աստրախանի հետ հայերի վաղեմի կապերի վերականգնում²⁶, առևտրական կապերի հաստատում։ Չնայած թշնամական փոխհարաբերություններին, ռուսները շարունակում էին իրենց առևտուրը Կաֆայում և Ազովում, իսկ թուրքերը (ներանց հետ նաև հայերը)՝ Մոսկվայում²⁷։

1563 թ. վրաց իշխանի հայ ներկայացուցիչը անգլիացի Ջենկինսոնի խնդրում է Մոսկվայի ցարին հայտնել օգնություն հայցելու իրենց ցանկության մասին։ Ջենկինսոնը Իվան IV-ից ստանում է դրական պատասխան՝ օգնության պատրաստակամության վերաբերյալ²⁸։

Բայց միայն Ֆեոդոր Իվանովիչ ցարի օրոք (1584—1596 թթ.) Մոսկվան պաշտոնապես հայտարարվեց Վրաստանի հովանավորն ու տիրակալը։ Քանի որ Թուրքիան նվաճել էր Անդրկովկասի մի մասը, պարսից շահը, հուսալով ստանալ ռուսական օգնություն, պատրաստակամություն էր հայտնում Ռուսաստանին հանձնել Դերբենտը, Շամախին, Բաքուն։ Այդպիսի առաջարկ նա արել էր իր ղեկավարի միջոցով Մոսկվայում, ապա և հաստատել, երբ 1586 թ. Պարսկաստանում էր ռուս ղեկավար Վասիլչիկովը։ Վրաց Ալեքսանդր Թագավորը խնդրում էր Ռուսաստանի պաշտպանությունը և շահի հետ միասին պահան-

24 ПСРЛ, т. XVIII, № 130.

25 Տե՛ս «Казанская история», М., 1954, № 154 և հտ. կամ «Казанский летописец», ПСРЛ, т. XIX, № 130.

26 Տե՛ս «Историческое описание древнего Российского музея, под названием Мастерской Оружейной палаты», М., 1807. Տե՛ս նաև «Собрание актов, относящихся к обозрению истории армянского народа», т. II, М., 1838.

27 Տե՛ս Н. М. Карамзин, История государства Российского, т. IX, М., 1903, № 65.

28 Տե՛ս «Английские путешественники в Московском государстве в XVI в.», Л., 1937, № 211 և հտ.։

չում թերեքի վրա ամրոց կառուցել և զորք ուղարկել՝ նվաճելու շամխալի իրկիրը²⁹։

Դ. Ֆլետչերը հիշատակում է, որ 1588 թ. Մոսկվա է եկել Սիոնի պատգիարք Խերոնիմը (Սրեմիան), նպատակ ունենալով համոզել ցարին զաշինքի մեջ մտնել Իսպանիայի հետ՝ Թուրքիայի դեմ պայքարի համար. նույն նպատակով Մոսկվա էին եկել դեսպաններ Վրաստանից։ Նա ընդգծում է, որ այդ բանակցություններն ընթանում էին բարեհաջող, անդամ կազմավորված էր Իսպանիա ուղարկվելիք դեսպանությունը, բայց դործը ձախողվեց՝ Իսպանիայի հետ մղված պատերազմում Անդլիայի տարած հաղթանակի հետևանքով³⁰։ Անդրկովկասի ժողովուրդները այլևս չէին կարող հույսեր կապել օրրստօրի թուլացող Իսպանիայի հետ։

Թուրքիան ու Ղրիմը՝ այդ ժամանակաշրջանի Ռուսաստանի մշտական իշխամիները, շարունակ ստպատակում էին երկիրը, հաճախ հասնելով մինչև Մոսկվա, իսկ 1595 թ. դա՛ քարձրացած Մահմադ III սուլթանը հարմար առիթի լր սպասում՝ Ռուսաստանին պատերազմ հայտարարելու համար։ Անդրկովկասի ժողովուրդների շահերը օբյեկտիվորեն կապված էին Ռուսաստանի հետ, նրանց սպառնացող վտանգն ընդհանուր էր. և Մոսկվան պետք է դառնար աղատագրական պայքարի դորավիդ, քաղաքական կապերի հանգուցման կենտրոն։ 1588 թ. մինչև XVII դ. սկիզբը գրեթե անընդմեջ բանակցություններ են մղվում Վրաստանի և Ռուսաստանի միջև։

1590 թ. Մոսկվայից ռազմական օգնություն է խնդրում Իբերիայի Ալեքսանդր իշխանը³¹։ Ֆեոդոր Իվանովիչ ցարին ուղարկած հրովարտակում նա պրում է. «Իմ հույսն ու ապավենը աստված է և դու։ Հրամայիր պատերազմել շամխալության դեմ և կապիկովիկների երկրում բերդ կառուցել... այն ժամանակ իմ զորքը կմիանա թագավորական զորքերին»³²։ 1594 թ. Բորիս Գոդունովը կարգադրել էր Ճարկի բերդը գրավել և՛ ճանապարհ հարթել դեպի Վրաստան, գիտենալով հանդերձ, որ այդ քայլը կրքեր կբորբոքի Թուրքիայում։

Վրացիները և հայերը հույսեր էին կապում հակաթուրքական ուժերի հետ, դիմումներ անում ինչպես արևմտյան երկրներին, այնպես նաև Ռուսաստանին։ 1594—96 թթ. վրաց իշխանի դեսպաններ Խուրշուդը և Արամը ռուս արքունիքից խնդրում են զորք ուղարկել և հպատակեցնել շամխալին։ Նույն այդ ժամանակ վրաց իշխանը և Շահ Աբաս I-ը հակաթուրքական պայքարի կոչով նամակ են ուղարկում Իսպանիայի թագավոր Ֆիլիպ II-ին³³։ Եթե Իսպանիան ոչինչ չաբավ և չէր կարող անել, ապա Ռուսաստանը Թուրքիային է գիմում, միջնորդում, որ «իր հպատակներին» չճնշեն և Վրաստան է ուղարկում թնդանոթներ ապա և զորք՝ Բուտուլինի և Պլեշչեի ղեկավարությամբ։ Սակայն 1604 թ., խախտելով խաղաղության համաձայնությունը, թուրքական փաշան ուխտադրուժ հարձա-

²⁹ Տե՛ս Н. М. Карамзин, *изв. изъ.*, հատ. X, էջ 30—31։ Տե՛ս նաև С. Белокуров, *Сношения России с Кавказом*, СПб., 1889, էջ 562—564։

³⁰ Տե՛ս Д. Флетчер, *О государстве русском*, СПб., 1906, էջ 90—91։

³¹ Տե՛ս М. Броссе, *Переписка на иностранных языках грузинских царей с российскими государями*, СПб., 1861, էջ V։

³² Տե՛ս С. Белокуров, *изв. изъ.*, էջ 264։

³³ Նամակը գրված է հայերեն և վերջանում է այսպես. «Գրեցաւ թուղթս յիրկիրն Կոնստանտնի, ի թագաւորանիստ քաղաքն Տփլիս ի թիւն հայոց Ռեւն, օղոստոս ամսո ժԴ»։ Զ. Բյուր-տյան, *Հայ աղատադրական փորձ մը ժԶ դարուն, տե՛ս «Անահիտ»*, Փարիզ, 1937, № 5—6։

կում է գործում 7000-անոց ուսուցիչների վրա և շամխալի, կումիկ մուրղաների ու թաթարների օգնությամբ ջարդում Անդրկովկասին օգնության եկած ուսուցիչներին³⁴։

Այս մարտական մկրտությունը վերջնականապես հաստատեց այն փաստը, որ Մոսկովյան պետությունը շահագրգռված է և պատրաստ է օգնել Անդրկովկասի ժողովուրդներին՝ նրանց ազատագրական պայքարում։ Սակայն լեհ-շվեդական ինտերվենցիան և Ռուսաստանի ծանր վիճակը խանգարեցին բաղադրական կապերի (ինչպես և առևտրական հարաբերությունների) հետագա զարգացմանը։

Մոսկվայի ազատագրումը լեհական ինտերվենտներից, պետականության վերականգնումը և ասպ լեհերի հետ կնքված զինադադարը վերստին աշխուժացրին տնտեսական կյանքը և առևտուրը հարևան երկրների հետ։ Հայերի առևտուրը Մոսկվայի հետ նույնպես սկսեց զարգանալ։ Դեռևս XVI դարից Մոսկվայում՝ Կրեմլի մոտ կար Հայկական առևտրատուն (քարվանսարա)³⁵։ Բվան IV-ի տնային ունեցվածքի 1582 թ. ցուցակի մեջ հիշատակվում են մի շարք հայերի անուններ (Ռոմոգանով, Մարտինով, Մուրատով, Սիմոնով, Ամիրև), որոնք արքունիքին վաճառել են ձիեր, թամբեր ու այլ ձիասարքեր³⁶։

Դ. Ֆլետչերը, որ 1588 թ. եղել է Ֆեոդոր Իվանովիչ ցարի (1584—1596 թթ.) մոտ, գրում է. «Թուրքական, պարսկական, բուխարական, վրացական, հայկական և քրիստոնեական աշխարհի զանազան արդյունաբերողներ արտահանում են 400—500 հազար ռուբլու մորթեղեն»³⁷։

Նույն երկրների վաճառականները Մոսկվա էին տանում մետաքսյա գործվածքներ, արծիճ, թանկագին քարեր³⁸։ Հայերը XVII դարում առևտուր էին անում ոչ միայն Մոսկվայում, այլև նրանից հյուսիս գտնվող Մեծ Նովգորոդում³⁹։ Բայց հայերը միայն առևտրի համար չէին գնում Մոսկվա։ 1607—1609 թթ. Մոսկվայում է լինում Ավգուստինոս Բաջեցի կաթոլիկ կրոնավորը, որն ինչ-որ նպատակով վրաց սրբաշորդի Բագրատի և Հռոմի պապի նվիրակի հետ լինում է Աստրախանում, ասպ անցնում է Մոսկվա (որտեղ իրեն ցար էր հռչակել կեղծ Դիմիտրին), այնտեղից էլ Լեհաստան ու Արևմտյան Եվրոպա⁴⁰։

XVII դարի երկրորդ քառորդից սկսած հայերի այցելություններն ու հաջգաղութի աճը Մոսկվայում ավելի նկատելի են դառնում։ 1626 թ. չորս հայ ու երկու ադրեբեջանցի վաճառականներ հսկայական արժեքի արևելյան ապրանքներ են տանում Մոսկվա⁴¹։

1632 թ. Սարգիս Օվանեսովը իր ուսուցիչ հետ Ղրիմից գալիս է Մոսկվա,

34 Տե՛ս С. Белокуров, նշվ. աշխ., էջ CL և հտ.։

35 Պարսկական քարվանսարա կամ առևտրական տուն հիշատակվում է միայն XVII դ., իսկ հայկական՝ 1599 թ. հիշատակվում է «Իլի գորոգում», «Իլյինսկի վորոտայի» մոտ։ Տե՛ս «Акты исторические», т. II, էջ 19։

36 «Аргамак рыж, лыс, кафинца Ромодана Абренмова», «Аргамак сер, арменина Манунловской Мартынова», «Аргамак темносер, арменина Якушевского...»։ Տե՛ս Н. Забелин, Домашний быт русских царей, М., 1915, էջ 846—869։

37 Д. Флетчер, նշվ. աշխ., էջ 111։

38 Նույն տեղում, էջ 51։

39 Տե՛ս «Акты археографической экспедиции», т. I, СПб., 1836, էջ 399։

40 Տե՛ս Բ. Պ., նշխարք մատենագրության հայոց, ՍՊԲ, 1884։

41 Տե՛ս Центральный гос. архив древних актов (ЦГАДА), фонд 100 (Сношения России с Арменией), 1626 թ. գործ։

խնդրում մշտական բնակության իրավունք, հայտնելով, որ Ղրիմից փախչում է ազգային ու կրոնական ճնշումների պատճառով Օվանեսովը աշխատանքի է նշանակվում ղեկավարական պրիկազում (արտաքին դործոց աստյան)⁴²։ Մի րանի հայեր գալիս են Վրաստանից, մնում Մոսկվայում և հունադավանություն քնդունում (1627 թ.՝ Ռոման Բեդրին, 1634 թ.՝ Շահնազարը⁴³ և այլն)։ Մոսկվայում են լինում արդեն նախիջևանի արքեպիսկոպոս դարձած Ավդուստինոս Բախեցին⁴⁴, Անտոնիոսը և շատ ուրիշներ։

Այս ժամանակներում է, որ նոր աշխուժություն է սկսվում հայ ազատագրական շարժան մեջ։ «Վրաց պատմության» հեղինակ Փ. Գորգիջանիձեն հաղորդում է, որ Գանձասարի Պետրոս կաթողիկոսը 1634 թ. վրաց Թեյմուրազ I (1583—1663 թթ.) թագավորին առաջարկում է համատեղ ուժերով զնալ Ասորյատականի վրա և ազատել անգամ Թավրիզը, ընդ որում խոստանում է հայկական 40.000 զորքի օգնություն⁴⁵։ Այս արժեքավոր վկայությունը (40.000 զորքով ապստամբվելու հայերի պատրաստակամության մասին) հաստատվում է նաև այն փաստով, որ Հոլշտինիայի դուքսի ղեկավար Օտտո Բրուգեմանը, որը նույն տարիներին վերադարձել էր Պարսկաստանից և 1639 թ. բանակցություններ էր վարում ռուս արքունիքի հետ, նմանօրինակ առաջարկություն է անում Ռուսաստանին և դարձյալ շնչում 40.000 հոգով կուլի ելնելու հայերի պատրաստակամությունը։ Կրեմլի այդ գաղտնի խորհրդակցությանը մասնակցել են նաև հայեր⁴⁶ (Հովհաննեսի որդի Գևորգը և Փիլիպոսի որդի Մարկոսը)։ Հավանաբար այդ տրամադրությունները և Ռուսաստանին դիմելու հանգամանքները բարելավում են հայ-ռուսական հարաբերությունները, և էջմիածնի նվիրակ Ռսկան վարդապետին հաջողվում է թուլլտվություն ստանալ Ասորախանում հայկական եկեղեցի կառուցելու համար⁴⁷։ 1637 թ. Մոսկվայից Վրաստան է ուղարկվում Վոլկոնսկու ղեկավարությունը, 1638 թ. Մենգրելիայի իշխանը օգնություն է խնդրում Մոսկվայից, իսկ Միխայիլ Ռոմանովի (1613—1645) արքունիքը հայտնում է, որ շահին դրել է, թե Վրաստանը վաղուց ի վեր Ռուսաստանի իշխանության տակ է եղել և որ շահը չհարձակվի իրեն վասալ երկրի վրա⁴⁸։

Արդեն պարզ էր, որ Ռուսաստանի արևելյան րազաբականության հարցերից մեկն էր դարձել Անդրկովկասի զեթ հովանավորումը և որ հայերն ու վրացիները իրենց ազատագրական պայքարում լուրջ ակնկալություններ ունեին Մոսկվայից, ինչպես և նրան դաշնակից ու թուրքական ագրեսիայից տուժող երկրներին։

Պատահական չպետք է համարել ինչպես պաշտոնական ղեկավարություններին հանձնարարվող հետախուզական առաջադրանքները և հուսադրություն-

42 նույն տեղում, 1632 թ. դործ։

43 նույն տեղում, ֆոնդ 1505, 1634 թ. դործ, № 2։

44 А. О л е а р и й. Описание путешествия в Московию и через Московию в Персию и обратно, СПб., 1906, էջ 82—83։

45 Լ. Մ ե լ ի բ ս ե թ-բ ե կ, Վրաց աղբյուրները Հայաստանի և հայերի մասին, հատ. Բ, Երևան, 1936, էջ 112։

46 Տե՛ս А. О л е а р и й, նշվ. աշխ., էջ 66 և 140—143։

47 Տե՛ս «Служилъ», 1876, № 47։

48 Տե՛ս «Материалы по истории грузинно-русских взаимоотношений 1615—1640 гг.», Тбилиси, 1937, էջ 59։

ները, այսպես էլ հայ ու ռուս մարդկանց «անսպաշտոն» ուղևորությունները Արևելք։

Գ. Դարանաղյին պատմում է, որ Բարերդցի Ղազար վարդապետին, որ եկել էր «յՌուսնն և ի Հեհնն լրտես», տեղի իշխանությունները «կալան զնա և էղին ի բանտ մահապարտաց»⁴⁹։ Մեծ հետաքրքրություն է ներկայացնում Ֆեոդոր Կոտովի ճանապարհորդությունը դեպի Պարսկաստան ու Թուրքիա, որտեղ նրբանկատ ռուսը տեսել է ժողովրդի վիճակը, հասկացել նրանց տրամադրությունները, հանգամանորեն նկարագրել է քաղաքների վիճակը, առևտուրն ու արհեստները⁵⁰։ Հետաքրքիր է, որ Վասիլի Գադարը 1634—1637 թթ. Երուսաղեմ է գնում, անցնելով Թբիլիսիի, Երևանի, Ղարսի, Արզահանի, էրզրումի վրայով, ապա նկարագրում ճանապարհորդությունը, խոսում է չմիածնի եկեղեցիների, Երևանի ու Արարատի մասին, առևտրի ու արհեստագործության, ռազմական ու քաղաքական անցքերի մասին⁵¹։

1652 թ. Մոսկվա է գնում Թեյմուրազը՝ ցարից ռազմական օգնություն խնդրելու, բայց Ալեքսեյ Միխայլովիչը (1645—1676 թթ.) խոստանում է միայն նյութական ու դիվանագիտական օգնություն, քանի որ Ռուսաստանը պայքարում էր Ուկրաինայի համար և նոր բարդություն ստեղծել նաև Պարսկաստանի հետ չէր կարելի։ Թուրքիայի, Ղրիմի և Հեհնաստանի դեմ տարիներ մղված պայքարն ու հաղթանակը և Ուկրաինայի վերամիավորումը ավելի ուժեղացրին ակնկալությունները և հավատը Մոսկվայի նկատմամբ։ Սկսվեց մեծ հոսանք դեպի Մոսկվա։

Մոսկվայի հայ բնակչության դերը մեծանում է միայն 1650—1660-ական թթ., երբ ձևավորվում են հայ-ռուսական տնտեսական և քաղաքական կապերը, երբ ռուսական պետությունը վերամիավորելով Ուկրաինան և հաջողությամբ ետ մղելով թուրք-թաթարական հարձակումները, սկսում է ավելի համարձակ արեւելյան քաղաքականություն վարել, ավելի մոտիկից զբաղվել Անդրկովկասի հարցերով։ Այդ գիտին հայերը, որոնք իրենց դիմումների մեջ շեշտում էին Մոսկվայի հետ իրենց կապած հույսերն ու ազատագրական ձգտումները։

Մոսկվայում մշտական բնակություն են հաստատում ոչ միայն առևտրականներ ու արհեստավորներ, այլև մտավորականներ՝ թարգմանիչներ, դիվանագետներ։ Դրանց մի մասը Մոսկվա է փոխադրվում Աստրախանից, Ղրիմից և այլ գաղթավայրերից, մյուսը՝ Հայաստանից ու Անդրկովկասից՝ ռուսական, պարսկական, լրացական դեսպանների հետ։

Մոսկվայում որպես տղամաշնի (բանավոր թարգմանություն կատարող պաշտոնյաներ) ծառայում էին աստրախանցի Թավաքալովի որդիները՝ Բորիսը և Իվանը, ընդ որում Իվանը հանձնարարություն է ստանում հանդիպել 1654 թ. Պարսկաստան ուղարկված Լորանով-Ռոստովսկու հետ։ Նույն թվականին այդ դեսպանության հետ Աստրախանից Ռուսաստան է գալիս հայազգի Վասիլի Դաուդովը, որն ընդունվում է դեսպանական պրիկազ և 50 տարի ծառայում, թարգմանից հասնելով մինչև դեսպանի, վոյեվոդայի պաշտոնների, կա-

⁴⁹ Գրիգոր Դարանաղցի, Ժամանակագրութիւն, Երուսղեմ, 1915, էջ 409—410։

⁵⁰ «О ходу в Персидское царство, а из Персиды в Турцию...», МОНДР, т. XV, М., 1852, էջ 1—22։

⁵¹ Տե՛ս «Житие и хождение в Ерусалим и Египет В. Я. Гапары. 1634—1637 гг.», СПб., 1891։

~ Հանդես, N 1

տարելով խոշոր ու պատասխանատու դիվանադիտակուն հանձնարարություններ Թուրքիայում, Ղրիմում, Ուկրաինայում⁵²։ Թարգմանիչների պաշտոնում Մոսկվայում ծառայել են նաև հայազգի Վասիլ Իվանովը, Աթանաս Իվանովը և ուրիշներ։ Շերեմետևի հետ լեհաստանում է եղել հայ թարգման Աֆ. Աֆանասևը⁵³։ «Մեծ դեսպան» Լոբանով-Ռոստովսկու մոտ ծառայում էր և ուղեկցեց նրան Պարսկաստան (1653—1654 թթ.) Մարկ Արմյանինը⁵⁴, իսկ Միշեցկոս դեսպանությանն ուղեկցում էր Աֆ. Իվանովը։ XVII դ. 50—60-ական թթ. հիշատակվում են Վասիլի Իվանովը⁵⁵, Վ. Թոքմաքչևը⁵⁶ և ուրիշներ։

1660 թ. Մոսկվա են գնում Նոր Զուղայի նշանավոր վաճառականներ խոջա Զաքարյան ու իր ինն ընկերները, ցարին տանելով բազմաթիվ պերճանքի ապրանքներ, այդ թվում XVII դ. հայ արվեստի գեղեցիկ գործը՝ նշանավոր ադամանդյա դահլե, որ այսօր էլ դարդարում է Կրեմլի Զինապահեստը և ՍՍՀՄ արվեստի ֆոնդի մեծարժեք նմուշներից մեկն է։

Ինչպես հաղորդում է Զաքարը, դահլե գաղտնի պատրաստել են նրա արհեստանոցում հայ վարպետները և գաղտնի էլ տարել Մոսկվա։ Գահի վրա լատիններենով գրված է. «Հլորագույն ու անպարտելի Մոսկովյան կայսր Ալեքսեյին, հրկրի վրա բախտավորությամբ թագավորողին՝ մեծագույն արվեստով ու եռանդով պատրաստված այս դահլե թող լինի բախտավոր նախանշանակ գալիքի...»⁵⁷։ Գահի «նվեր» տալը և հիշյալ մակագրությունը խոսում են այն մասին, որ սա մի սովորական առևտրական գործարք չէ, որ կատարվում էր։ Հայ վաճառականներն ուղում էին արտահայտել իրենց վերաբերմունքը, հույսն ու հավատը Ռուսաստանի նկատմամբ, միաժամանակ ցույց տալով առևտրի իրենց մեծ հնարավորություններն ու հարստությունը։

Խոջա Զաքարը Մոսկվայի դեսպանական ատյանում ասում է, որ «շահր նրա հորը պարգևներ է տալիս», բայց շահական մեծությունը մուսուլմանություն է դավանում, իսկ իրենք բրիտոնական դավանանքի մարդիկ են, ուստի ուրախ են աշխատել ու ծառայել մեծ թագավորի համար»⁵⁸։

Խորհրդանշական էր Զաքարի բերած մյուս նվերը՝ պղնձյա թերթի վրա պատկերված «խորհրդավոր ընթրիք» կոմպոզիցիան, որը շատ դուր է գալիս ցարին և նա հրամայում է Զաքարին դրա նկարչին ուղարկել Մոսկվա։ Ալեքսեյ Միխայլովիչը պահանջում է նաև արքունիքում ծառայելու համար ուղարկել «այլ վարպետներ, թանկագին քարեր, գաղաններ, թռչուններ... որ խոսում են հնդկերեն»⁵⁹։ Խոջա Զաքարին ռուսական արքունիքն ընդունում է ինչպես դեսպանի, կազմակերպում է պաշտոնական այց Ալեքսեյ Միխայլովիչ ցարի մոտ, Զաքարին տրված տան առաջ կանգնեցվում են ժամապահներ և հանձնարարվում է նրա և նրա մարդկանց հետ վարվել «պաղաքշաքար»։ Դրանից հետո

⁵² Տե՛ս ЦГАДА, ф. Сношения России с Персией, опись I, дело 1654 г., № 5. Տե՛ս նաև «Акты исторические», т. IV, էջ 184։

⁵³ Տե՛ս Архив Ленинградского отделения института истории АН СССР (ЛТОИИ), фонд Астраханской приказной палаты, дело № 4334։

⁵⁴ «Акты исторические», т. IV, էջ 184։

⁵⁵ Նույն տեղում, № 5151։

⁵⁶ Նույն տեղում, էջ 436։

⁵⁷ Տե՛ս «Собрание актов...», т. I, М., 1833, էջ 64։

⁵⁸ ЦГАДА, ф. 100 (СРА), дело 1660, р. 18, հմմտ. «Армяно-русские отношения в XVII в.», Ереван, 1953, էջ 25։

⁵⁹ Նույն տեղում, р. 1—5։

աւլանդույթ է դառնում դիւանագիտական հանձնարարութեամբ Մոսկվա եկած-նեիրին, խոշոր վաճառականներին ու կրօնականներին տոն օրերին ցարական պալատ հրավիրելը:

1666 թ. փետրվարին Մոսկվա են հասնում 40 հայեր, որոնք որպէս հայկական առևտրական ընկերության ներկայացուցիչներ դեսպանական ատյանում Յուրի Դուգորովիի և ապա Օրդին-Նաշչոկինի հետ սկսում են բանակցութիւններ, որոնք ավարտւում են, 15-ամյա: տեսակցութիւններից հետո, արքունիքի և հայկական ընկերության միջև առևտրական պայմանագրի կնքումով: 1667 թ. մայիսի 31-ին պայմանագիրը հաստատւում է և այսպէս կոչւած «Զուղայական կոմպանիային» իրավունք է տրւում տարանցիկ առևտուր անել Ասիայի ու Եվրոպայի միջև՝ Աստրախանից վոլգյան մայրուղով մինչև Արխանգելսկ, վճարելով մաքս՝ ապրանքի արժեքի 5 տոկոսի չափով: Այդ հայ վաճառականութեանը տրւած շատ մեծ արտոնութիւն էր, բանի որ տարանցիկ առևտրի իրավունք չէր ստացել ոչ մի պետութեան վաճառականութիւն, չնայած դարավոր ու համառ այն ջանքերին, որոնք գործադրւում էին եվրոպական պետութիւնների կողմից: Պետք է նշել, որ այդ արտոնյալ ու մենաշնորհ առևտրի իրավունքը տրւած էր ոչ թէ միայն ջուղայեցիներին, այլ բոլոր հայերին⁶⁰:

Պայմանագիր կնքելու համար Մոսկվա եկած 40 հայերի մեջ կային ինչպիսի Զուղայի, այնպիս էլ Թբիլիսիի, Շամախիի, Ագուլիսի և այլ քաղաքների վաճառականներ, արհեստավորներ, գործակատարներ և այլք: Նրանց հետ եկել էր նշանավոր նկարիչ Բոգդան Սալթանովը, որ աշխատանքի է անցնում Կրեմլի Զինապալատում որպէս նկարիչ, մեծ դեր կատարում ռուսական գեղանկարչության ու կիրառական արվեստի զարգացման գործում, միաժամանակ նույնպէս հայկական առևտրի զարգացմանը և հայ-ռուսական կապերի ամրապնդմանն ու ծաւալմանը:

Ուշագրավ է և այն փաստը, որ Մոսկվա եկած հայերը միայն առևտրական գործերով չեն զբաղւում, այլև հոգում են գաղութների բարգաւաճման, արևմտահայերի հետ կապերի ստեղծման, Հայաստանին օգնութիւն կազմակերպելու մասին: Նրանց ստորագրութեամբ մի մեծածաւալ նամակ է ուղարկւում էլ. Պոլսի հայերին, որոնց կոչ է արւում ամեն բանով օգնել Պոլիս մեկնող ռուսական դեսպանութեանը, որին զինավորում էր խոշորագույն քաղաքական գործիչ, դեսպանական ատյանի ղեկավար Ա. Լ. Օրդին-Նաշչոկինը՝ հայերի բարեկամը և հակաթուրքական լիգայի կողմնակիցը: Նամակի հեղինակները շեշտում են Օրդին-Նաշչոկինի դերը հայերին տրւած արտոնութիւնների ձեռքբերման գործում, դրւում են նրա բարի կամքն ու մեծ խելքը: Նրանք գրում են, որ ռուսական կառավարութեան և Նաշչոկինի ցուցաբերած բարյացակամութեան որոշ արտահայտութիւնների մասին բանավոր կհայտնի դեսպանութեան կազմի մեջ գտնվող հայազգի Վասիլի Դաուդովը: Նամակագիրները խորհրդում են Պոլսի հայերին ամեն բանում և ամեն կերպ օգնել ռուսական դեսպանութեանը, դրանով վարձահատույց լինելով հայերին ցույց տւած բարեկամութեան համար:

Հայտնի է, որ 1667 թ. հունվարի 30-ին Օրդին-Նաշչոկինը ստորագրել էր Լեհաստանի հետ կնքւած հաշտութեան Անդրկովկասյան պայմանագիրը, որով

⁶⁰ См. В. Восканян, Ново-торговый устав и договор с Армянской компанией, 2002 г. «Сельскохозяйств», 1947, № 6:

ոչ միայն հաստատվում էր Ուկրաինայի վերամիավորման պատմական ակտը և խաղաղությունը, այլև դաշինք էր ստեղծվում Ռուսաստանի ու Հեհաստանի միջև՝ թուրք-թաթարական ագրեսիայի դեմ համատեղ պայքարի համար։ Հայերը կարող էին արդեն որոշակի հույսեր կապել հակաթուրքական լիգայի հետ, մի հանգամանք, որ ուժեղացնում էր աղատագրական շարժման ուսական կողմնորոշումը։ Դրան մեծապես նպաստում էր նաև հայերին տրված արտոնագրի ու պայմանագրի տնտեսական ու քաղաքական դերն ու որոշակի հակաթուրքական ուղղվածությունը, քանի որ Ռուսաստանի վրայով կատարվող տարանցիկ առևտուրը թուրքական արքունիքը ղրկելու էր այն մեծ մաքսային գանձումներից, որ ստացվում էին Պարսկաստանի մետաքսը Եվրոպա փոխադրելու համար։

Մոսկվա եկած հայերը դիմումներ էին անում արքունիքին, խնդրում բարելավել ճանապարհներն ու նրանց անվտանգությունը, կառուցել քարվանսարաններ, շենքեր ու եկեղեցիներ, որտեղ հայերը կարողանային աղոթք անել, մկրտել նորածիններին, թաղել մահացածներին և կամ թույլատրել օգտվել ուսական եկեղեցիներից։ Մոտ երկու տարի Մոսկվայում ապրած հայ վաճառականները և հատկապես նրանց ղեկավարներ Գրիգոր Լուսիկովը և Ստեփան Ումոդամսկին ղգալի դեր կատարեցին հայ գաղութի կյանքում։ Քիչ անց Մոսկվայում արդեն գործում էր ս. Աստվածածին եկեղեցին⁶¹։ 1666 թ. ապրիլին Մոսկվայում ստեղծվեց սեկի (սաֆյանի) գործարան, որի վարպետ նշանակվեց սեկագործ Հայրապետ Մարտինովը։ Ինչպես երևում է սեկի գործարանի ստուգումների ժամանակ կաղմված մատյաններից⁶², դա պարզունակ ու համեստ արհեստանոց էր (որի արտադրությունը կաղմակերպված էր նույն սկզբունքներով, ինչ Հայաստանում ու Մերձավոր Արևելքում) և արքունի սեփականություն էր՝ ենթակա նախ գաղտնի գործերի, հետո՝ «մալոռոսիյսկի պրիկագին» և հիմնականում մատակարարում էր արքունիքին։

Մի գրությունից մենք իմանում ենք, որ «Մ. Մառդյասովի և Բ. Իվանովի գործերը՝ 6 կարմիր, 4 մուգ ու 3 կապտագույն և այլ սեկեր հանձնված են պաղտնի գործերի մատյան»⁶³։

Սակայն XVII դ. Մոսկվայում դեռևս չկային արդյունաբերության զարգացման բարենպաստ պայմաններ։ Ծանր էր և սեկի ու դամշի արտադրության վիճակը. տեխնիկան պարզունակ էր, արտադրանքի որակը՝ ցածր, ինքնարժեքը՝ բարձր, քիչ էին մասնագետներն ու քանվորները, սահմանափակ էր շուկան, ուստի այդ տնայնագործական տիպի արհեստանոցը կարողացավ իր գոյությունը շարունակել միայն 6 տարի և փակվեց, շենքերն ու ողջ ունեցվածքը հանձնվեց «մալոռոսիյսկի պրիկագին»⁶⁴։

Պետք է նշել, որ Մոսկվայում սեկի արտադրության կաղմակերպումը ռուսական արքունիքը նախատեսել էր դեռևս 6—7 տարի առաջ, երբ 1660 թ. ցարը խոչա Ջաքարին հանձնարարեց վարպետներ ուղարկել։ 1660 թ. Մոսկվա ե-

61 ՏՆՍ ЦГАДА, ф. 1252, опись I, д. 382. ՏՆՍ նաև Центральный государственный исторический архив в Ленинграде, ф. 880, оп. 5, д. 12, л. 10։

62 ՏՆՍ «Описание записных книг и бумаг дворянских приказов», 1613—1725 гг.», М., 1883, т. 568—571։

63 Նույն տեղում, տ. 570։

64 Նույն տեղում։

կաթ հայերի մեջ էին Հայրապետ Մարտինովը՝ առաջին սեկագործ վարպետը, ինչպես և նրան փոխարինող Մարտին Մարգյասովը։ Նշանավոր նկարիչ Բոգդան Սալթանովը և մի շարք վաճառականներ (Նադար Իվանիսովը, Եղիա Շիրմազյանովը) ու վարպետներ դարձան Մոսկվայի մշտական բնակիչներ⁶⁵։

Մեծ դեր էր կատարում մեծատաղանդ ջուղայեցի հայ նկարիչ Բոգդան Սալթանովը՝ Մոսկվայի Կրեմլի Զինապալատի գլխավոր փեղանկարիչը, որը պատրաստեց մոտ 20 ուսու աշակերտներ (դրանցից շատերը դարձան նշանավոր նկարիչներ), զարդացրեց կիրառական արվեստը, ղեկավարեց Կոլոմենսկի հոյաշին պալատի գեղարվեստական հարդարման գործը, ստեղծեց հարյուրամյոր կտավներ, եվրոպականորեն ձևավորեց տոնական Մոսկվան, երբ Պետրոս I-ի հաղթական զորքերը Ալուվը նվաճելուց հետո հանդիսավորությամբ պետք է վերադառնալին մայրաքաղաք։

Այսպիսով, 1667 թ. պայմանագրի կնքումը և կիրառումը XVII—XVIII դդ. հայ վաճառականների, նրանց գործակատարների, արհեստավորների, դիվանագիտական ծառայողների ու բանադնացիների մի զգալի զանգվածի համար Մոսկվան դարձրին ծանոթ ու կարևոր հանգրվան, որի հետ կապված էին տեղական և քաղաքական շահեր ու հեռանկարներ։ Այդ տեսակետից հատկանշական է Ստեփան Ռոմադամսկու և հատկապես Գրիգոր Լուսիկովի գործունեությունը Մոսկվայում 1666—1672 թթ.։ Այսպես, իր բանակցությունների ժամանակ իր. Լուսիկովը համոզում էր արքունիքի ներկայացուցիչներին նպաստել առևտրին, ճանապարհների ապահովության համար Վոլգայի վրա ստեղծել ամրոցներ, իջևաններ, կառուցել ավաններ ու պահեստներ, հրովարտակ ուղարկել լեռնցի իշխաններին, նրանց պարտավորեցնելով բարյացակամորեն վարվել հայ ճանապարհորդների հետ և թույլատրել, որ ցանկացող հայերը կարողանան դալ ու մշտական բնակություն հաստատել ուսական քաղաքներում։ Լուսիկովը խառնվում էր նույնիսկ արտաքին հարաբերությունների հետ կապված գործերին, խնդրում էր, որ լեհ դեսպանների հետ լեհաստան մեկնելու հրամանագիր տրվի դոմինիկյան կրոնավորներին (որոնք Պարսկաստանի հետ բանակցություններ էին վարում՝ նրան հակաթուրքական կռաւիցիայի մեջ մտցնելու համար), առաջարկում էր, որ Վրաստանի Թեյմուրազ թագավորի թոռ Նիկոլայ Դավիդովիչին թույլատրվի Վրաստան գնալ և այլն⁶⁶։

Զգտելով նպաստել ուս-պարսկական բարեկամությանը և ցարի ու շահի մտերմությանը, Լուսիկովը արքունիքում խնդրում էր իրեն տալ Ալեքսեյ Միխայլովիչի գիմանկարը՝ շահին ներկայացնելու համար, քանի որ շահը հետաքրքրվել էր ցարի արտաքինով և պահանջել Լուսիկովից՝ նկարագրել, ցույց տալով նրան նման մեկին։ Բայց Լուսիկովն ասում է, որ ինքը Պարսկաստանում չգիտի մեկին, որ նման լինի Ալեքսեյ Միխայլովիչին⁶⁷։

Ստեփան Ռադինի պարսկական արշավանքի (1668—1669 թթ.) կապակցությամբ ուս-պարսկական հարաբերությունների մեջ սառնություն ստեղծվելու ժամանակներում Լուսիկովը ջանքեր էր թափում շահին համոզելու, որ Ռադինի կասպյան արշավանքը ուսական արքունիքի զրդմամբ կամ ցանկություն էր եղել։ Լուսիկովը ձգտում էր ուս-պարսկական բանակցությունների

65 ՏՃՍ ԱԴԱ, ֆ. 100, дело 1666 г., № 1, Թ. 69։

66 ՏՃՍ, նույն տեղում, дело 1666—1674 гг., № 2, Թ. 231—234։

67 ՏՃՍ նույն տեղում, Թ. 300—306։

միջոցով հասնել այն բանին, որ վրացական հողերը (մինչև Արաքս) տրվեն Նիկոլայ Դավիդովիչին և խաղաղ ձանադարհով՝ Վրաստանը (և Հայաստանի մի մասը՝ Երևանի խանությունը) դառնա Պարսկաստանից անկախ պետություն:

Այսպես, Գրիգոր Լուսիկովը, որ պաշտոնապես հանդես էր գալիս որպես շահի դեսպան, աշխատում էր նպաստել ռուս-պարսկական հարաբերություններին, ամրապնդել Ռուսաստանի դիրքերը Կովկասում, օգնել հայազգի լեհական դեսպան Բողգան Գուրգենին՝ բարելավելու նաև լեհ-պարսկական փոխհարաբերությունները, նպաստելով այդ երեք պետությունների ուժերի միավորմանը՝ Թուրք-թաթարական ադրեսիային դիմագրավելու համար: Շահի մոտ Լուսիկովն ասում էր, որ Թուրքիայում եղած ժամանակ ինքը լսել է, թե ինչպես «թուրքերը մեղեդներից գոռում էին «աստված մի արասցե, որ քրիստոնյաները միավորվեն: Եթե լեհերն ու ռուսները միավորվեն ու բարձրանան, Թուրքիան լիովին կտապալվի»⁶⁸:

Երբ 1660-ական թթ. Լուսիկովը Մոսկվայում ջանքեր էր գործադրում հայ-ռուս-վրաց բարեկամության ամրապնդման համար, Անդրկովկասում խմորվում էր աղատագրական շարժումը: 1665 թ. վրացական արքայորդու՝ Նիկոլայ Դավիդովիչի դեսպանը միտրոպոլիտ Եպիփանին Մոսկվայում հայտնում է, որ թուշ ու փշով վրացական ցեղերը, որ համառորեն ու հաջողությամբ կռվում էին իրենց անկախության համար, կողմնորոշված են դեպի Ռուսաստան և ցարին հավատարմության երդում են տվել⁶⁹:

Գանձասարի կաթողիկոս Պետրոսը և էջմիածնի կաթողիկոս Հակոբ Զուղայեցին դիմումներ են անում ցարին ու նրա դիվանագիտական օգնությունը հայցում: Էջմիածնի գաղտնի ժողովը 1678 թ. բանագնացներ է ուղարկում Ռուսաստան և Եվրոպա: Այդ բոլոր անցուդարձերի կենտրոնն է դառնում Մոսկվան, որի նշանակությունը տարեցտարի մեծանում է և XVII դ. վերջին հանրաձայնազդեցությամբ: Բավական է նշել, որ 1667—1700 թթ. Մոսկվայում են եղել ավելի քան 300 հայ վաճառականներ ու գործիչներ, մի քանի տասնյակ դիվանագետներ ու բանագնացներ:

1699 թ. Անգեղակոթում հավաքված գաղտնի որոշմամբ հայ ավագանին դիմում է Պետրոս Մեծին, խնդրելով Հայաստանն աղատել օտար լծից⁷⁰:

Համապատասխան հանձնարարականներով ու դիմումներով Եվրոպա են մեկնում աղատագրական շարժման նշանավոր գործիչները՝ մեծատաղանդ ու հեռատես դիվանագետ Խորաչեկ Օրին և Մինաս Վարդապետ Տիգրանյանը:

1703 թ. Մոսկվայի հաշկական եկեղեցուն ղանաղան նվերներ են տվել մոտ 50 հայեր, որոնց թվում Աբրահամ Ոսկանովը իր ընկերներով՝ 2 շանդան, Մանուկ Վարդանովը, Խարիտոն Տարասովը և Ավետ Մուրազովը՝ 32 ղուլտնիկ քաշով արծաթե խաչ, Ավետ Կաղարեը՝ երկու մեծ գեղանկարչական պատկեր (два образа живописные большие), Մանուկ Սուկազովը՝ շանդան, Ալեգար Տեսակովը՝ արծաթե խաչ 35 ղուլ., Սաֆար Մելիքովը՝ արծաթե խաչ 80 ղուլ., Սաֆար Վասիլը՝ արծաթե Սերովբե ու Քերովբե (վեցթևանի բարձրաստիճան հրեշտակներ) 80 ղուլ., Իվան Պավլովը՝ նոր Կտակարան, երկու կողմից

⁶⁸ Նույն տեղում, թ. 142:

⁶⁹ Տե՛ս М. Броссе, նշվ. աշխ., էջ LXV:

⁷⁰ Г. Эзов, Сношения Петра Великого с армянским народом, СПб., 1898, Տե՛ս նաև «Армяно-русские отношения в XVIII в.» (сборник документов под редакцией акад. А. Г. Иоаннисяна), Ереван, т. I, 1964, т. II, 1967:

արծաթե կաղնով, Ավետ Նիղարովը՝ շապիկներ և այլն (բոլորն էլ մեծ նվերներ)։ Մոսկվայում ջրհոր շինելու համար հայազգի Մոսկով Զախարովը նվիրաբերել է իր ժամանակի համար մի մեծ գումար՝ 320 ռ.⁷¹։

1701 թ. Մոսկվայում էին Ի. Օրին և Մինաս վարդապետը, որոնց գործունեությամբ Մոսկվայի հայ գաղութը դարձավ ռուսահայության զխավոր կենտրոնը և հայ-ռուսական կապերի հիմնական օղակը։

1701 թ. Օրու հետ էին և Մոսկվայում կարևոր գործեր էին կատարում Գյուլնազար Օրուխենցը (սաղար Օրեխովիչը) և Սիմոնները։ Օրին արքունիք է ներկայացնում 1701 թ. Սիմոնների հետ կաղմած հայկական ձեռնարկ քարտեզը, այն արքունիքին չէր բավարարել, և Օրին ու Սիմոնները 1703 թ. նոր քարտեզ են կաղմում, ավելի մեծ տեղ տալով Հայաստանի սահմանակից երկրներին, որոնք կարող էին այս կամ այն դիրքը բռնել հայերի ապստամբության և ռուս զորքերի երևալու դեպքում։ Նամակում Օրին գրում է. «Արդ... Ձերդ մեծությանն ևմ հանձնում մեր երկրի գծագիրը, որի վրա կարելի է տեսնել, թե ինչպես ամբողջ պետության մեջ երևանից բացի ոչ մի ամրոց չկա։ Երիցս երանելի աստված թող բարեբախտություն տա Ձերդ մեծությանը և ուժ Ձեր զորքերին, որպեսզի նրանք նվաճեն այդ, այնժամ ողջ Հայաստանն ու Վրաստանը կհպատակեցնենք Ձեզ»⁷²։

1703 թ. համանման քարտեզ կաղմելու պահանջ է ներկայացվել նաև վրաց Արշիլ թագավորին, որն ապրում էր Մոսկվայում և նույն ազատագրական նպատակով գործակցում հայերի հետ⁷³։

Վ. Դաուդովը, Միրոն Վասիլևը, Բ. Սալթանովը, Ի. Օրին, Մինաս Վարդապետը, Սաֆար Վասիլևը և Մոսկվայի մյուս հայ գործիչները հսկայական դեր էին կատարում հայերի քաղաքական ու տնտեսական կյանքում, օգնում ազատագրական շարժման զարթոնքին, կապեր հաստատում Հայաստանի և հայ գաղթավայրերի հետ, մասնակցում ղանաղան պետությունների միջև վարվող բանակցություններին, միջազգային դրության մասին տեղեկություններ հաղորդում ռուսական արքունիքին, նպաստում Անդրկովկասը թուրք-պարսկական տիրապետությունից ազատելու հարցը եվրոպական պետությունների առջև բարձրացնելու գործին։

АРМЯНЕ В МОСКВЕ В XV—XVII ВЕКАХ

В. К. ВОСКАНЯН

(Р е з ю м е)

Столица русского централизованного государства еще со второй половины XV в. стала играть заметную роль в жизни соседних народов, в том числе грузинского и армянского.

⁷¹ SL⁷⁰ Архив внешней политики России, фонд Сношения России с Арменией, дело 1722 г., № 1, л. 33—34.

⁷² Г. Э з о в, նշվ. աշխ., էջ 173.

⁷³ SL⁷⁰ Վ. Կ. Ո ս կ ա ն յ ա ն, Իսրայել Օրու կողմից Պետրոս I-ին ներկայացված նորահայտ քարտեզը, «Պատմա-բանասիրական հանդես», 1961, № 2.

Источники предоставляют ряд важных свидетельств о пребывании в Москве армянских купцов, посланников и гонцов от разных государств и стран—Грузии, Турции, Крыма, Польши. Еще в XV—XVII вв. грузины и армяне связывали определенные надежды с Россией в борьбе против турецкой агрессии. Эта надежда отражается как в дипломатических отношениях ряда стран, так и в прямых обращениях армянских и грузинских политических деятелей к России, в политике русского государства.

Роль Москвы особенно осязательна во второй половине XVII в., когда был заключен торговый договор между русским двором и Армянской компанией (1667 г.), оживились торгово-экономические и политические связи армян с Москвой. Русское правительство предоставило армянам не только торговые права и привилегии, но и разрешение транзитной торговли через Россию между Востоком и Западом. Политические связи с Москвой укрепились, сформировалась русская ориентация армянского освободительного движения. Роль Москвы в экономической, политической и культурной жизни армян особенно возросла в период царствования Петра Великого.